

# **Навоий вилояти хокими Турсунов Нормат Тулкуновичнинг хокимлик жамоаларига**

## **М У Р О Ж А А Т И**

Ҳаммамизга маълумки, коррупция ҳар бир мамлакат ижтимоий-иқтисодий тараққиёти учун улкан таҳдид бўлиб, у жамиятнинг маънавий-ахлоқий асосларини емиради. Мазкур иллат демократия ва қонун устуворлиги асосларига путур етказиб, инсон хуқуқларининг бузилишига олиб келади, ислоҳотларга тўсқинлик қилиб, жамият тараққиётини ортга суради. Одамларнинг давлатга, бошқарув идораларига ишончини сўндиради, ислоҳотлар ғоясини обрўсизлантириб, фуқароларнинг жамият ва давлат ишларини бошқаришдаги иштирокига салбий таъсир кўрсатади.

Мамлакатимизда юз берадиган шиддатли ўзгаришларга, аҳолининг турмуш даражаси кескин ўсиб бораётганига ҳар биримиз бирдек гувоҳ бўлмоқдамиз. Албатта, бу ислоҳотларнинг самараси барча соҳаларда қонун талабларига сўзсиз риоя этишга, коррупция холатларининг олдини олишга бевосита боғлиқ.

Давлат хизматчилари ўртасида коррупциянинг, пораҳўрлик ва бошқа мансаб суиистеъмолликларининг олдини олиш учун, уларнинг иш ҳақлари мунтазам ошириб борилмоқда.

Бироқ, ушбу йўналишда шунча ишлар амалга оширилаётган бир пайтда, айрим давлат хизматчилари ва мансабдор шахслар берилган ваколатларни қулай фурсат ва имконият сифатида қабул қилиб, бу тоифадаги жиноятларни содир этаётганлигини, амалга оширилаётган ислоҳотларга нисбатан хиёнатдан ўзгача таъриф билан изоҳлаш мумкин эмас.

Вилоятда коррупцияга қарши курашиш соҳасида ишни янгича ташкил қилиш мақсадида барча масъул идоралар билан ҳамкорликда бу борадаги фаолиятни яна бир бор танқидий кўриб чиқиб, келгусидаги вазифаларни аниқ белгилаб олиши лозим бўлади. Ҳар бир вазифа ва топшириқни садоқат, фидоийлик ҳамда юқори масъулият билан бажарилса, коррупция каби иллатдан халос бўлишга эришилади.

**Хурматли Президентимиз Шавкат Мирзиёевнинг "Давлат тизимини ичидан емирадиган, ижтимоий барқарорлик күшандаси бўулган коррупция балосига қарши, бюрократиянинг ҳар қандай кўринишларига, одамларни менсимаслик, маҳаллийчилик ва гурухбозлик иллатларига қарши барчамиз кескин кураш олиб боришимиз керак" дея таъкидлаганлари унинг хавфли иллат эканлигини кўрсатади.**

Очиқ айтиш керакки, бугунги кунда коррупцияга қарши қураш борасида амалга оширилаётган ишларни қониқарли деб бўлмайди. Бунга коррупцияга қарши қурашиш бўйича барча масъул ташкилотларда юклатилган вазифалар ва профилактик тадбирларнинг бир хилда ташкил этилмаганлиги ҳам сабаб бўлмоқда десам, адашмаган бўламан.

Хусусан, вилоят миқёсида ўтган 2023 йилнинг 6 ойи мобайнида 140 та коррупцияга оид жиноятлар қайд этилган.

Шундан:

- 35та фирибгарлик,
- 2 та тижоратда пора эвазига оғдириб олиш,
- 10 та мансаб ваколатини сустеъмол қилиш,
- 31 та мансаб сохтакорлиги,
- 1 та пора олиш,
- 59 та пора бериш,
- 1 та давлат органи хизматчиларининг қонунунга хилоф равишда моддий қимматликлар олиш ёки мулкий манфаатдор бўлиш,
- 1 та жиноий фаолиятдан олинган даромадларни легаллаштириш мансабдор шахслар коррупцион жиноят содир этганлиги учун жиноий жавобгарликка тортилган.

Шунингдек, пора бериш жинояти таҳлил қилинганда: Уларнинг;

- 28 таси ишга киритиш;
- 4 таси ўқишига киртиш;
- 1 таси жаримага тортмаслик;
- 7 таси кредит билан боғлиқ;
- 1 таси ётоқхона олиш;
- 17 таси ер олиб бериш;
- 1 таси автомашинасини жарима майдончасидан чиқариш ҳолатларида пора бериш жиноятлари содир этилган.

Шунингдек, жорий йилнинг 6 ойи давомида 32 та ноқонуний ер олди-сотдиси билан боғлиқ жиноий ҳолатлари аниқланган.

Шундан:

- Фирибгарлик 22 та;
- Хужжатларни қалбакилаштириш 6 та;
- Ҳокимият ёки мансаб ваколатини сустеъмол қилиш 1 та
- Бошқа турдаги 3 та жиноятлар содир этилган.

Ҳар бир маҳаллий ҳокимият аъзолари фаолиятимизни қайтадан холис таҳлил қилиб, маҳаллий ижро ҳокимликлари олдига қўйилган устувор вазифаларни шахсий манфаатимиздан устун қўйган ҳолда сидқидилдан бажаришга барча куч ва салоҳиятимизни сафарбар этайлик.

Иш фаолиятимизда коррупциянинг хар қандай кўринишига муросасиз муносабатда бўлиш, халқимизга ҳалол ва садоқат билан хизмат қилишни асосий бурчимиз ва вазифамиз деб билайлик!